

ԱՐՄԱՆԻ-ԱՐՄԻ ԵՐԿԻՐՆ

ԸՍՏ ԱՔԱԴԱԿԱՆ ԵՒ ԷԲԼԱՅԱԿԱՆ ԱՂԲԻՒՐՆԵՐԻ

(Պատմա-աշխարհագրական ակնարկ)

ԱՐՏԱԿ ՄՈՎՍԻՍԵԱՆ

Ք.ա. 2A-րդ դարի վերջին քսանամեակը շրջադարձային նշանակութիւն ունեցաւ Միջագետքի եւ ողջ Առաջաւոր Ասիայի պատմութեան մէջ: Միջագետքի Քիչ քաղաքում, հաւանաբար, կառավարական յեղաշրջմամբ գահ բարձրացաւ սեմական ծագում ունեցող, ժողովրդի ստորին խաւի ներկայացուցիչ Շարրումքէնը⁽¹⁾, որին պատմագրութեան մէջ կոչում են Սարգոն Հին կամ Սարգոն Աքադացի (Ք.ա. 2316-2261թթ.): Շումէրի արքայ Լուգալզիգեսի կողմից Քիչի ակերումից յետոյ, Սարգոնն իր մայրաքաղաքը դարձրեց մինչ այդ ոչ նշանաւոր Աքադէ քաղաքը, որի անունով յետագայում կոչուեց ողջ թագաւորութիւնը: Վերափոխելով բանակը՝ նա երեք-չորս տարում կարողացաւ իր իշխանութեան տակ միաւորել Միջագետքի քաղաք-պետութիւնները: Իրանից յետոյ Սարգոնը ձեռնամուխ եղաւ հեռաւոր արշաւանքների կազմակերպմանը: Իրենց նախադէպը չունեցող այդ արշաւանքների ընթացքում, նա եղաւ Սիրիայում, Փոքր Ասիայում եւ Հայկական Լեռնաշխարհի հարաւային շրջաններում, Չագրոսեան լեռներում: Նրա յաղթական պատերազմները փոտաբանող միջագետքեան սկզբնաղբիւրները կարելի տեղեկութիւններ են պարունակում արշաւանքի ենթարկուած երկրամասերի պատմութեան հնագոյն շրջանի լուսարանման համար:

Առաջաւոր Ասիայի Ք.ա. 3-րդ հազարամեակի պատմութեան վերականգնման համար իրենց կարելորութեամբ չեն զիջում Սարգոն Աքադացու թոռան՝ Աքադական Հարստութեան չորրորդ գահակալ Նարամ-Սուէնի (Ք.ա. 2236-2220 թթ.) պատերազմների մասին պատմող սկզբնաղբիւրները: Վերջինս Սարգոն Աքադացու «Շումէրի եւ Աքադի արքայ» տիտղոսը փոխարինեց «տիեզերքի արքայ», «աշխարհի չորս կողմերի արքայ», «աշխարհի արքայ» տիտղոսներով եւ աստուածացուեց իր կենդանութեան օրօք: Աքադական Հարստութեան յիշեալ երկու արքաների մասին պատմող սկզբնաղբիւրներն, ի թիւս

առաջաւորասիական այլ երկրամասերի, ուշագրաւ տեղեկութիւններ են հաղորդում Հայկական Լեռնաշխարհի հարաւային շրջանների վերաբերեալ:

Հայկական Լեռնաշխարհի Ք.ա. 3-րդ հազարամեակի պատմութեանը վերաբերող յոյժ արժէքաւոր տեղեկութիւններ են պարունակում նաեւ Էբլայի⁽²⁾ գրաւոր յուշարձանները: Նարամ-Սուէնի դէպի հիւսիս-արեւմուտք կատարած արշաւանքների տարեգրութիւններում մի քանի անգամ յիշատակուում են Արմանում (Արմանի)⁽³⁾ եւ Էբլա երկրները, ընդ որում, այդ երկիրները երբեմն յիշուում են միասին: Էբլայի բնագրերում յաճախ է հանդիպում Արմի երկրանունը, որն իրաւացիօրէն նոյնացուում է Արմանիի հետ:

Սոյն յօդուածում նպատակ ունենք անդրադառնալու Ք.ա. 24-23-րդ դարերում քաղական եւ Էբլայական սկզբնաղբիւրներում յիշատակուած Արմանի-Արմի երկրին վերաբերող փաստերին եւ դրանց ընձեռած հնարաւորութեան սահմաններում լուծելու այդ երկրի տարածքային ընդգրկման հարցը:

ՍԿՋՐՆԱՂԲԻԻՐՆԵՐԸ

Հենց սկզբից հարկ ենք համարում նշել, որ ձեռքի տակ չենք ունեցել խնդրոյ առարկայ երկրին վերաբերող բոլոր սկզբնաղբիւրները: Դրանց մի մասին ծանօթացել ենք միջնորդաբար՝ այլ աշխատութիւններից օգտուելով, իսկ մի մասն էլ մնացել է մեզ համար անհասանելի: Այդուհանդերձ, մեր ունեցած գրականութիւնն էլ բաւարար է լուսարանելու Արմանի-Արմի երկրի տեղորոշման հարցը:

Արմանի երկիրը յիշուում է Սարգոն Աքադացու մասին պատմող նոր-ասուրական մի բնագրում⁽⁴⁾: Աւելի հարուստ են Նարամ-Սուէնի գործերը փառաբանող բնագրերը: Հիւսիս կատարած արշաւանքների մասին մեզ պատմում են Միջագետքի Ուր քաղաքից գտնուած նրա արձանագրութիւնների պատճէնները, որոնցում յիշատակուում է Արմանին⁽⁵⁾: Արշաւանքներից մէկի մասին է պատմում «Նարամ-Սուէնն ու իր թշնամիները» անունը ստացած խեթերէն բնագիրը⁽⁶⁾, որում Արմանին վկայուած է Նարամ-Սուէնի դէմ զաշնակցած տասնեօթ երկրների շարքում: Նարամ-Սուէնի յաղթարչաւի վկայութիւնն է նաեւ Դիարբեքի մօտ գտնուած նրա յաղթանակի յուշակոթողը⁽⁷⁾: Արմանի-Արմի երկրանուան յետազայ յիշատակումներ են հանդիպում խեթական, ասուրա-բաբելական, Վանի թագաւորութեան արձանագրութիւններում եւ այլ աղբիւրներում, որոնք ստորեւ կ'օգտագործուեն իբրեւ լրացուցիչ փաստարկներ:

Եթէ միջագետքեան սկզբնաղբիւրները պատերազմական տարեգրութիւններ են՝ ապա հիւսիսսիրիական (Էբլայական) աղբիւր-

ները, հիմնականում, տնտեսական վաւերագրեր են: Դրանք վերաբերում են էրլայի արքունի ծախսերին, այլ երկրների ու քաղաքների հետ ունեցած առևտրա-փոխանակային եւ այլ յարաբերութիւններին: Չեռքի տակ շունենալով էրլայական բնագրերի հրատարակութիւնները՝ դրանցից օգտուել ենք Վ. Իվանովի⁽⁸⁾, Ա. Արքիի եւ Փ. Գարելիի⁽⁹⁾ յօդուածների միջնորդութեամբ:

ՀԱՐՑԻ ՊԱՏՄԱԳՐՈՒԹԻՒՆԸ

Աքաղական աղբիւրների Արմանի երկրի տեղորոշման հարցը տասնամեակներ շարունակ եղել է բանավէճի առարկայ: 1929 թ. ապրիլին խեթագէտ Բ. Հրոզնին, հիմնուելով Սարգոն Աքաղացու մասին պատմող բնագրի, ինչպէս նաեւ Թիգլաթպալասար Ա-ի ու Սամանասար Գ-ի արձանագրութիւնների հաղորդումների վրայ, Արմանին տեղադրեց Չագրոսում եւ բացառեց այդ տեղանունը ընդհանրութիւնն Արմանիա երկրանունի հետ⁽¹⁰⁾: Նոյն թուին Գ. Գարանֆիլեանը հանդէս եկաւ Արմանին Բեհեսթունի արձանագրութեան Արմինայի հետ նոյնացման տեսակէտով⁽¹¹⁾: Այնուհետեւ Արմանին մի շարք եւրոպացի ուսումնասիրողների կողմից (որոնց մէջ էր նաեւ իր տեսակէտը վերանայած Բ. Հրոզնին) տեղադրուեց Հիւսիսային Սիրիայում՝ Հալէպի Պալման կամ Պալման տեղում⁽¹²⁾: 1938 թուին Արմանին կրկին կապուեց Հայկական Լեոնաշխարհի հետ⁽¹³⁾: Ն. Ադոնցը, բնագրատելով Արմանին Հայաստանի հետ կապելու փորձերը, հնարաւոր էր համարում Արմանիի նոյնացումը Հալէպի Պալման կամ աստուածաշնչեան Հերմոնի հետ⁽¹⁴⁾: Սակայն Արմանին Հայաստանի հետ նոյնացնելու տեսակէտը զնալով աւելի էր (ե՛ւ է) քաղաքացիութիւն ստանում. այդ տեսակէտը պաշտպանեցին Ե. Քասունին⁽¹⁵⁾, Ա. Ալպոյաճեանը⁽¹⁶⁾, Հ. Ժամկոչեանը⁽¹⁷⁾, Լ. Բարսեղեանը⁽¹⁸⁾, Ա. Կիֆիշինը⁽¹⁹⁾, Վ. Պաշատրեանը⁽²⁰⁾, Մ. Գալուքեանը⁽²¹⁾, Ռ. Իշխանեանը⁽²²⁾ եւ ուրիշներ: Այսուհանդերձ, Արմանիի տեղադրութեան վերաբերեալ միասնական կարծիք չկայ: Տիրապետող երկու տեսակէտներն Արմանին տեղադրում են Հայկական Լեոնաշխարհում կամ Հիւսիսային Սիրիայում:

էրլայագիտութիւնը երիտասարդ գիտութիւն է, եւ նրա շատ հարցերի հետ Արմիի խնդիրն էլ կը դառնայ երկարատեւ ուսումնասիրութեան առարկայ: Սակայն, այս կարճ ժամկէտում էլ Արմիի մասին արտայայտուել են իրարամերձ կարծիքներ: Սկզբում կասկածի տակ դրուեց Արմիի տեղանուն լինելու հարցը⁽²³⁾, իսկ դրա լուծումից յետոյ Արմանիի նման Արմին եւս ուսումնասիրողներին բաժանեց երկու խմբի:

Ստորեւ մեր ունեցած աղբիւրների քննութեամբ կը փորձենք ցոյց տալ Արմանի-Արմի երկրի գտնուելու վայրը:

ԱՔԱԴԻ ԵՒ ԱՐՄԱՆԻ

Արմանի երկիրն առաջին անգամ յիշատակուած է Սարգոն Ա- քաղացու մի արշաւանքի առընչութեամբ: Ըստ այդ արշաւանքի մա- սին պատմող նոր-ասուրական բնագրի՝ յիշեալ արքան Լուլուբի երկ- րից յետոյ լինուած է Արմանիում, ապա վերադառնում Աքադ⁽²⁴⁾: Եթէ Սարգոնը Լուլուբիից Աքադ է վերադարձել ուղիղ գծով (ինչը, որ չի հասկացուած բնագրից)՝ ապա այս Արմանիին կարելի է նոյնացնել Բաբելոնի եւ Աշուրի միջեւ յիշատակուող Արման-Ակարսալի տե- ղանուան (դրա մասին՝ ստորեւ) հետ, որը որեւէ ուղղակի կապ չունի Հայկական Լեռնաշխարհի հետ: Սակայն, Սարգոնը արշաւանքը Լու- ւուբիից կարող էր շարունակել հիւսիս-արեւմուտք եւ մտնել Սիմես- եան Արմանիի (սրա մասին եւս քիչ յետոյ) տարածք: Հետեւաբար, բերուած տեղեկութիւնը վճռական նշանակութիւն չունի Արմանի երկրի տեղորոշման խնդրում:

Նարամ-Սուէնի գործերը ներկայացնող Ուրի արձանագրու- թիւնները յստակ ուրուագծում են նրա արշաւանքը դէպի հիւսիս: Նա հասնում է Ամանոս, ապա արշաւում Հիւսիսային Միջագետք, որտեղ էլ «Սուբարտուի տանուտէրերն ու Բարձրաւանդակի (Լեռնաշխարհի) իշխաններն իրենց հարկերը բերին նրա առաջ»: Այդ առթիւ յիշուած է նաեւ Արմանի երկիրը⁽²⁵⁾: Նարամ-Սուէնից առաջ Ամանոս էր ար- շաւել Սարգոն Աքաղացին, որի ճանապարհին յիշատակուած են Մա- րին, Եարմուտին եւ էրլան⁽²⁶⁾: Աքադից Ամանոս ճանապարհին Ար- մանին չի նշուած, ինչն էլ քիչ հաւանական է դարձնում այդ երկրի տեղադրումը Հիւսիսային Միջագետքում: Փոխարէնը՝ Արմանին յիշուած է Սուբարտուից յետոյ՝ իբրեւ Բարձրաւանդակի երկիր: Կաս- կածից վեր է, որ Սուբարտուի հարեւանութեամբ յիշատակուող Բարձրաւանդակը Հայկական Տաւրոսն է կամ Հայկական Լեռնաշխար- հի աւելի ընդգրկուն մի շրջան (գուցէ ողջ Լեռնաշխարհը): Հետեւա- բար, այդ տարծքում էլ պէտք է տեղադրել Արմանի երկիրը:

Արմանիի տեղորոշման համար խիստ կարեւոր նշանակութիւն ունի Նարամ-Սուէնի հիւսիս կատարած արշաւանքի մասին վկայող «Նարամ-Սուէնն ու իր թշնամիները» կոչուող խեթերէն բնագիրը: Այն հաղորդում է միջագետքի արքայի դէմ ելած հիւսիսային տասնեօթ երկրների դաշնութեան մասին: Երկրներից ու նրանց ար- քաններից մի քանիսի անունները չեն պահպանուել, իսկ ընթերցուող երկրանունները հետեւեալն են.

1. Գուտուա	7. (Պուրուշխանդա) ⁽²⁷⁾	13. ...
2. Պակկի ի...	8. Ամուրրու	14. Լարակ
3. Ուլլիվի	9. Պարասի	15. Նիկկի
4. ...	10. ...	16. Քուրկի
5. Խաթթի	11. Արմանի	17. Կուրսաուրա
6. Կանէշ	12. Մայրիների լեռներ (Ամանոս)	

Այս դաշնակցութեան տարածքային ընդգրկման մասին դիտողութիւնները պէտք է արուեն տրամաբանական մէկ ելակէտից. վաղընջական մի ժամանակաշրջանում, ինչպիսին է Ք.ա. 23-րդ դարը, որեւէ ռազմական դաշինք չէր կարող ընդգրկել շատ մեծ հեռաւորութեան վրայ գտնուող երկրներ: Եւ քանի որ դաշինքի մէջ մտած երկրներինց յատկօրէն տեղադրուող շորսը՝ Ուլլիվին, Խաթթին, Կանէշը եւ Ամանոսը գտնուել են Փոքր ասիայի արեւելեան, Հայկական Լեռնաշխարհի արեւմտեան եւ դրանց յարակից հարաւային շրջաններում, իսկ Նարամ-Սուէնի յաղթական թողը գտնուել է Դիարբեքի մօտ, դաշնակցութեան միւս երկրները եւս պէտք է որոնել նշուած ու յարակից տարածքներում:

Ուլլիվի երկիրը յիշատակում է խեթական, ասուրա-բաբելական ու Վանի թագաւորութեան սեպագիր արձանագրութիւններում՝ Ուլլիվանդա⁽²⁸⁾, Ուլլիբի⁽²⁹⁾ եւ Ուլլիրանի⁽³⁰⁾ ձեւերով: Այն տեղադրում է Հայաստանի հարաւ-արեւմուտքում՝ Ղուլփ բնակավայրի տեղում (Դիարբեքից արեւելք)⁽³¹⁾:

Խաթթին խեթական պետութեան անուանումն է, որի մայրաքաղաքը գտնուել է այժմեան Բողազքէօյ հնավայրի տեղում (Անկարայի մօտ):

Կանէշ քաղաքը եղել է Փոքր Ասիայի, Հայաստանի հարաւ-արեւմտեան շրջանի եւ Հիւսիսային Սիրիայի առեւտրական կէտերի համակարգի կենտրոն: Այն գտնուել է Կեսարիա (Մաժաբ) քաղաքի մօտ՝ այժմեան Քիւլ-Թեփէ հնավայրի տեղում:

Պուրուշխանդան (եթէ ճիշտ է ենթադրեալ ընթերցումը), գրտնուել է Կիլիկիան Տաւրոսի եւ Հալիս գետի ոլորանի միջեւ, Տուզլճի մօտ⁽³²⁾:

Ամուրրուն նախկինում նոյնացուել է ամորէացիների երկրի հետ⁽³³⁾, որը գրաղեցրել է Շումէրից եւ Աքադից արեւմուտք ընկած տարածքները: Սակայն, ինչպէս ասուից, նման հեռաւորութեան վրայ հազիւ թէ կնքուած լինէր ռազմական դաշինք, նամանաւանդ, որ Ամուրրուի տարածքն արդէն պէտք է նուաճուած լինէր Նարամ-Սուէնի կողմից: Մեր կարծիքով՝ այս Ամուրրուն Սարգոն Բ-ի յիշատակած Ամուրուն է, յետագայ Փոքր Հայքի Ամարան (Համարա) եւ գտնուել է Սեբաստիայի նահանգում, Տեւրիկ քաղաքից ոչ հեռու⁽³⁴⁾:

Պարասին նոյնացուել է Բարասչի (Պարասչի), Պարու եւ Պարուա (Պարուաշ) երկրանունների հետ⁽³⁵⁾: Առաջին երկուսը տեղադրուած են էլամի եւ յարակից տարածքներում: Պարուն յայտնի է Բեհեսթունի արձանագրութիւնից եւ համապատասխանում է այժմեան Տարս նահանգին, իսկ Պարասչին Բարելունի նկատմամբ աւելի հեռու է գտնուել էլամից: Սրանց հետ նոյնացումը մեզ խիստ անհաւանական է թուում նախ հեռաւորութեան պատճառով, եւ երկրորդը՝ էլամը Աքադի կողմից նուաճուել էր Նարամ-Սուէնի անմիջական նախորդի՝ Մանիշտուշուի օրօք⁽³⁶⁾: Հաւանական ենք համարում Պարասիի նոյնացումը ասուրաբարելական եւ Վանի թագաւորութեան արձանագրութիւններում վկայուած Պարուա (Պարուաշ) երկրի հետ, որը գտնուել է Ուրմիա լճի հարաւակողմում՝ Մանա երկրի հարեւանութեամբ⁽³⁷⁾:

Յաւօք, մեզ չի հասել ցուցակում Արմանիին նախորդող երկրանունը, իսկ յաջորդը յայտնի Ամանուսի լեռներն են՝ Կիլիկեան Տարուսի հարաւ արեւելեան կողմում (Հիւսիսային Սիրիայի արեւմուտքում):

Թուրկին (որոշ աղբիւրներում՝ Թուրուկի) բազմիցս յիշատակուում է առաջաւորասիական բնագրերում⁽³⁸⁾: Այն տեղադրուում է Ասորեստանից հիւսիս, Չագրոսի հիւսիսային լեռնաճիւղերին⁽³⁹⁾ եւ, հաւանաբար, իր անունն է թողել Վանի նահանգի Հաքեարի գաւառի Թուրկունիս բնակավայրին⁽⁴⁰⁾:

Եւ վերջին՝ Կուրսուրա երկիրը, կարծում ենք կարելի է ենթադրաբար տեղադրել Փոքր Ասիայի արեւելեան կամ Հայկական լեռնաշխարհի արեւմտեան գաւառներում՝ հիմնուելով այդ տեղանունան վերջին -ուրա բազազրիչի խեթա-լուվիական ծագման վրայ⁽⁴¹⁾:

Արմանի երկրանունան յետագայ յիշատակումներին կ'անդրադառնանք քիչ յետոյ, բայց մինչ այդ անհրաժեշտ ենք համարում վկայակոչել զրանցից մէկը: Խեթական Թուրխալիաս Դ. արքայի տարեգրութեան մէջ միասին յիշատակուում են Արմանա եւ Ուլիվանդա երկրանունները: Ուլիվանդան, ինչպէս վերը նշուեց, Նարամ-Սուէնի դէմ ելած Ուլիվին է՝ ասուրա-բարելական եւ Վանի թագաւորութեան աղբիւրների Ուլիբին եւ Ուլիբանին. տեղանունան վերջին -անդա մասնիկն ունի խեթական ծագում⁽⁴²⁾: Ուլիվիի յիշատակումը Դիարբեքիբից արեւելք եւ Արմանիի հետ վկայուելը խեթական բնագրում ենթադրում ենք վերջինիս Ուլիվիին յարակից տարածքներում գտնուած լինելը:

Ամփոփելով Նարամ-Սուէնի մասին խեթերէն բնագրի տեղագրական վերլուծութիւնը՝ տեսնում ենք, որ նրա դէմ դաշնակցած հիւսիսային երկրները տարածուել են Ուրմիա լճի հարաւ եւ հարաւ-

արեւմտեան շրջաններից (Պարաս եւ Թուրկի) մինչեւ Փոքր Ասիայի կենտրոն (Խաթթի, Կանէշ եւ Պուրուշսանդա (°) ու Ամանոսի լեռներ: Նման տեղորոշումը միանգամայն հաւանական է թոււմ, մանաւանդ, որ Նարամ-Սուէնն ի փառաբանումն եւ ի յիշատակ հիւսիսում տարած իր յաղթանակի՝ յուշակոթող է կանգնեցրել Դիարբեքիւրի մօտ⁽⁴³⁾: Իսկ Դիարբեքիւրը գտնոււմ է դաշնակցած երկրների մեր տեղադրութեամբ ուրուագծուող տարածքաշրջանի կենտրոնում: Աքադերէն եւ խեթերէն բնագրերը ոչ միայն չեն հակասում, այլեւ լրացնում են միմեանց:

Ուշադրութեան արժանի է մի հանգամանք եւս. աքադական բնագրերում Նարամ-Սուէնը փառաբանոււմ է որպէս «նուաճողը Արմանիի եւ էրլայի»⁽⁴⁴⁾: Ինչո՞ւ էր աշխարհակալ Նարամ-Սուէնը հիւսիսի եւ հիւսիս-արեւմուտքի նուաճած երկրների մէջ առանձնացնում եւ նման մեծ նշանակութիւն տալիս յատկապէս այս երկու երկրներին: Հարցի հնարաւոր պատասխանը գտնուեց 1975 թուին, երբ իտալացի հնագէտները յայտնաբերեցին էրլան: Առաջաւոր Ասիայում ունեցած դերի ու հարեւան երկրների վրայ տարածած ազդեցութեան պատճառով ուսումնասիրողներն էրլան «կայսրութիւն»⁽⁴⁵⁾ կոչեցին: Այն Նարամ-Սուէնի նուաճած երկրների մէջ եղել է հիւսիս-արեւմտեան գերտէրութիւնը: Պէտք է կարծել, որ նոյն նշանակութիւնը հիւսիսում ունեցել է Արմանին, եւ Արմանիի ու էրլայի նուաճումը խորհրդանշել է հիւսիսի եւ հիւսիս-արեւմուտքի հպատակեցումը: Հնարաւոր է, որ Խորենացու «Ողբում» Հայաստանին տրուած «հանուրց հիւսիսականաց վեհագոյն» («բոլոր հիւսիսային երկիրներից վեհագոյն») պատուանուն-մակդիրը Խորենացին վերցրած լինի իր սկզբնաղբիւրներից, որոնք օգտուել են սեպագրերից, եւ այդ մակդիրը վերցրած լինի Ք.ա. 3-րդ հազարամեակի բնագրերից:

Այժմ անդրադառնանք Արմիի վերաբերեալ էրլայի գրաւոր աղբիւրների հաղորդած տեղեկութիւններին:

ԷԲԼԱ ԵՒ ԱՐՄԻ

էրլայի բնագրերում Արմին երբեմն յիշատակոււմ է էրլայի հետ (Eb-la^{ki} wa Ar-mi^{ki})⁽⁴⁶⁾ եւ յիշեցնում աքադական աղբիւրների Արմանուն ու էրլան: Նման ձեւով արձանագրուելը կարող էր նշանակել երկու երկրների միաւորումը մէկ պետութեան մէջ (համաժողովրդացում): Սարգոն Աքադացու պետութեան անուանումը՝ «Շումէրի եւ Աքադի թագաւորութիւն»՝ էրլայական վաղ շրջանի բնագրերում Արմին յի-

շատակում է իրրեւ առանձին արքայ, իսկ աւելի ուշ՝ էբլայի կուսակալ (փոխարքայ) ունեցող երկիր⁽⁴⁷⁾: Որտե՞ղ է գտնուել այդ երկիրը:

Արդէն ասուել է, որ աքաղական բնագրերի քննութիւնը խիստ անհաւանական է դարձնում Արմանի տեղադրումը Հիւսիսային Սիրիայում: Ինչ վերաբերում է Արմանի (Արմի) Հալէպի հետ նոյնացնելուն՝ ապա այն եւս չի դիմանում քննութեան. էբլայական բնագրերը Արմից անկախ յիշատակում են Հալէպը՝ Պալարի ձեւով. այն նոյն կերպ յիշում է նաեւ Մարիի (Միջագետքի քաղաք-պետութիւններից) արխիւներից գտնուած բնագրերում⁽⁴⁸⁾:

էբլայի բնագրերից մէկն Արմին յիշատակում է Sa-MI + SIT Ax(?)^{ki}-ից եւ Du-lu քաղաքից յետոյ⁽⁴⁹⁾: Sa-MI + SIT Ax^{ki}-ն ընթերցւում է նաեւ Sa-x^{ki}, Sa-za^{ki} եւ հանդիսացել է էբլայի կենտրոնի անուանումը: Du-lu քաղաքը սովորաբար յիշւում է Ուրշուից⁽⁵⁰⁾ յետոյ եւ Իրիթումից⁽⁵¹⁾ ու Պառանից⁽⁵²⁾ առաջ⁽⁵³⁾: Այսինքն՝ այդ քաղաքը գտնուել է Ուրշուի եւ Պառանի շրջանում: Էբլա-Ուրշուի եւ Պառանի շրջան - Արմի յաջորդականութիւնը յուշում է, որ վերջինս պէտք է որ գտնուէր առաջին երկու բնակավայրերը կապող գծի ուղղութեան վրայ, այն է՝ Եփրատի Հայկական Տաւրոսով անցման շրջանում կամ յարակից տարածքներում: Յիշենք, որ այս տարածքը համապատասխանում է աքաղական աղբիւրների Բարձրաւանդակին (Սուբարտուից հիւսիս), եւ հենց այս տարածքում՝ Դիարբեքիւրի մօտ է նարամ-Սուէնը կանգնեցրել յաղթանակի յուշակոթողը: Այդ շրջանում է տեղադրւում նաեւ Ուլլիվանդայի հարեւանութեամբ յիշուած Արմանա երկիրը (Ք.ա. 13-րդ դար):

Մէկ այլ բնագրում⁽⁵⁴⁾ յիշւում են Արմիի երկու բնակիչ, որոնցից մէկն անուանուած է Հայայի միջնորդ (լիագոր): Այնուհետեւ, նոյն բնագրում յիշատակւում է Ազի տեղանունը (կամ գուցէ ցեղանունը): Վերջինս ակնյայտօրէն յիշեցնում է խեթական աղբիւրների Ազի երկրանունը (հմմտ. հայկական Ազորգի հետ), որի կենտրոնը գտնուել է Մեծ հայքի Տայք նահանգի տարածքում, ժամանակակից Թորթում գետի աւազանում⁽⁵⁵⁾: Մի ուրիշ բնագրում Հայա անունը կապւում է Hutimu տեղանուան հետ, որը յիշատակւում է Չարարում, Ութիգա, Ուրշու (Հիւս. Սիրիա), Իրիթում, Պառան (Հիւս. Միջագետք) եւ Թիշում քաղաքներից յետոյ⁽⁵⁶⁾: Զի բացառւում, որ այս Պութիմուի անունը պահպանուած լինի Մեծ Հայքի Տուրուբերան նահանգի Պոյթ գաւառի անուան մէջ, որն այժմ յայտնի է Պութ ձեւով⁽⁵⁷⁾:

Այսպիսով, մի կողմից Արմիի յիշատակումն Ազիից առաջ, միւս կողմից Արմիի կապուելը Պութիմուի հետ Հայա ցեղանուան

(յատուկ անուան) միջոցով, ինչպէս նաեւ վերը բերուած համադրումներն աներկբայելի կերպով վկայում են, որ էրլայի բնագրերում հանդիպող Արմի երկրանունը վերաբերել է Հայկական Լեռնաշխարհի տարածքին:

ԱՐՄԱՆԻ-ԱՐՄԻ ԵՐԿՐԱՆՈՒԱՆ ՅԵՏԱԳԱՅ ՅԻՇԱՏԱԿՈՒՄՆԵՐԸ

Ք.ա. 24-23-րդ դարերից յետոյ Արմանի-Արմի երկրանունը յիշատակուած ենք գտնում Ք.ա. 3-2-րդ հազարամեակների սահմանագծով թուազրուող Աշուրից գտնուած մի երկլեզուեան արձանագրութեան մէջ՝ Ուր/ա/մէ ձեւով⁽⁵⁸⁾: Արձանագրութիւնը, սակայն, տեղադրութեան վերաբերեալ տուեալներ չի հաղորդում:

Առանձնայատուկ ուշադրութեան է արժանի Սարգոն Աշուրացու (Ք.ա. 1880-1948 թթ., ըստ Ադոնցի) մի արձանագրութիւն, որում թուարկում է Աշուրի վեց նահանգ: Զուպրեան Մարի, Ռիպագում, Տիգրիսի կամ Աշուրի մարզ, Առափիսա մինչեւ Լուրգի, Լուլուրի եւ Սիմեսեան Արմանի⁽⁵⁹⁾: Մարին Եփրատի միջին հոսանքի նշանաւոր քաղաքներից է, գտնուել է Սիրիայի ու Իրաքի այսօրուայ սահմանի եւ Եփրատի հատման շրջանում: Զուպրին (Շուքրիա կամ Շուքարտու) գտնուել է Հայկական Լեռնաշխարհի հարաւ-արեւմուտքում կամ հիւսիսային Միջագետքում, եւ Մարիի «Զուպրիան» կոչուելը, հաւանաբար, ցոյց է տուել այդ մարզի տարածուածութիւնը հիւսիս: Ռիպագումը եւս գտնուել է Եփրատի վրայ, Մարիից հարաւ, ժամանակակից Բաղդադի մօտ: Աշուրը կառուցուած է եղել Տիգրիսի վրայ, վերջինիս Փոքր Զարի հետ խառնուելու վայրից քիչ հիւսիս: Առափիսան տեղադրում է ժամանակակից Քերքուքի մարզում (Իրաք), իսկ Լուրգին ասուրական պետութեան սահմանային ամրոց է, որը գտնուել է Տիգրիսից արեւելք՝ Ասորեստանի հարաւում⁽⁶⁰⁾: Այս վերջին մարզն ընդգրկել է պետութեան հարաւ-արեւելեան շրջանները: Լուլուրին տեղադրում է Ադէմ եւ Փոքր Զար գետերի վերին հոսանքում՝ Առափիսայի ու Ուրմիա լճի միջեւ: Սիմեսին տեղադրում է Վանայ լճից հարաւ-արեւելք⁽⁶¹⁾: «Սիմեսեան Արմանի» տեղանունը, թերեւս, նշանակում է Արմանիի տարածուածութիւնը մինչեւ Սիմեսի (հիմա. Զուպրիան Մարի) կամ, դուցէ, ցոյց է տալիս Արմանի երկրի Սիմեսիին հարեւան մի շրջան, որը տուեալ ժամանակաշրջանում մտել է ասուրական պետութեան կազմի մէջ: Թրւարկուած մարզերն, ինչպէս տեսնում ենք, ունեն տրամաբանական յաջորդականութիւն՝ հիւսիս-արեւմուտքից ժամ-սլաքի հակառակ ուղղութեամբ դէպի հիւսիս-արեւելք: Այսպիսով, Սարգոն Աշուրա-

ցու յիշատակած Արմանին պէտք է տեղագրել Հայկական Լեոնաշխարհի հարաւ-արեւելեան շրջանում՝ Վան եւ Ուրմիա լճերի միջեւ եւ դրանից հարաւ:

Աղագ-Ներարի Ա-ի (Ք.ա. 1307-1275 թթ.) եւ Բարեյունի արքայի միջեւ կնքուած դաշնագրում երկու թագաւորութիւնների սահմանին նշուած է Արման-Ակարսայի տեղանունը⁽⁶²⁾: Աշուրի եւ Բարեյունի միջեւ Արման տեղանունան յայտնուելը կամ պատահական նրմանութիւն է Հայկական Լեոնաշխարհի Արմանիի հետ կամ Լեոնաշխարհի բնակչութեան տարաբնակեցման արդիւնք է⁽⁶³⁾:

Խեթական արքայ Թուդիսայիաս Դ-ի յիշատակած Արմանա երկրի մասին արդէն խօսել ենք: Արմանի-Արմի երկրանունան հետ պէտք է կապել նաեւ խեթական աղբիւրների Արմատանա⁽⁶⁴⁾ եւ Թեզարամա⁽⁶⁵⁾ տեղանունները: Երկուսն էլ յիշատակուած են Հայկական Լեոնաշխարհի արեւմուտքում, իսկ Թեզարամա (Թոզարմա) — Թորգոմա երկրանունը Աստուածաշնչի մեկնիչներն ու հայ մատենագիրները համարել են Հայաստանի հնագոյն անուանումներից մէկը⁽⁶⁶⁾:

Գալովասուրա-բարելական եւ Վանի թագաւորութեան սկզբընաղբիւրներին՝ տեսնուած ենք, որ դրանցում պահպանուել են բազմաթիւ տեղանուններ, որոնք կարելի է կապել Արմանի-Արմի երկրանունան հետ:

Թիզլաթպալասար Ա-ն (Ք.ա. 1115-1077 թթ.) Հայկական Լեոնաշխարհի արեւմուտքում բազմիցս յիշատակուած է ուրումացիներին (= Ուրումա երկրի բնակիչներին)⁽⁶⁷⁾, Արամու երկիրը, որի ճանապարհին էր գտնուած Շուբրիա երկիրը⁽⁶⁸⁾, ինչպէս նաեւ Արումա լեոնանուն⁽⁶⁹⁾ ու Ուրումի ծառատեսակը⁽⁷⁰⁾: Աշուրնաձիլապալ Բ-ն (Ք.ա. 884-859 թթ.) Շուբրիա եւ Նիրգուն երկրներից յետոյ եւ Նայիրիից առաջ յիշուած է ներքին Ուրումու երկիրը⁽⁷¹⁾, եւ Նայիրիի հարեւանութեամբ յիշատակուած Արումու երկրանունը⁽⁷²⁾:

Վանի թագաւորութեան գրաւոր յուշարձաններում պահպանուած Ուրմէ եւ Արմէ տեղանունները գտնուել են Հայկական Տաւրոսի շրջանում⁽⁷³⁾:

Սալմանասար Գ-ն (Ք.ա. 859-824 թթ.), իսկ աւելի քան մէկ դար անց նաեւ Սարգոն Բ-ն (Ք.ա. 722-705 թթ.) յիշատակուած են Արամալի (Արմարիլի) երկրանունը՝ Վանայ լճից Արեւելք տարածուող շրջանում⁽⁷⁴⁾: Այս տեղանունը կարելի է նոյնացնել Սարգոն Աշուրացու արձանագրութեամբ պահպանուած (Սիմեսեան) Արմանիի հետ, ինչպէս նաեւ վերոյիշեալ Նարամ-Սուէնի դէմ պատերազմած Արամ(է) երկրի անունան հետ, որին կ'անդրադառնանք յետագայում այլ առիթով:

Միեւնոյն «ար/ա/մ» հիմքն ունեցող եւ Վանայ լճի արեւելեան եւ արեւմտեան շրջաններում գտնուած այս տեղանունների միջեւ կապող օղակ է հանդիսանում Աղաղ-Ներարի Բ-ի (Ք.ա. 810-782 թթ.) յիշատակած Արիմէ երկրանունը՝ Քաշիարի լեռների եւ յարակից շրջաններում⁽⁷⁵⁾, ուստի եւ միանգամայն օրինաչափ պէտք է համարել Վ. Պաշատրեանի տեսակէտը Արմանի երկրի տարածքային ընդգրկման վերաբերեալ⁽⁷⁶⁾։

Եւ վերջապէս Բեհեթունի արձանագրութեան մէջ յիշատակուող երկրանունը⁽⁷⁷⁾, որն, աներկբայելի կերպով վերաբերում է ողջ Հայաստանին։

Բացի վերը բերուածներից՝ կարելի է ցոյց տալ Արմանի-Արմի երկրանունան հետ կապուող այլ տեղանուններ եւս, որոնց կ'անդրադառնանք այլ առիթով։

Ինչպէս տեսանք, Ք.ա. 24-6-րդ դարերում երկու տասնեակից ւաւելի անգամ յիշատակուող «ար/ա/մ» հիմքով տեղանունները խմբաւորուած են Հայկական Լեռնաշխարհի հարաւային եւ արեւմրտեան սահմանների լայնութեամբ, այսինքն՝ այն տարածքներում, որոնց լեռնաշխարհի հետ առընչուելիս առաջին հերթին հանդիպել են մեզ հասած յիշատակութիւնների հեղինակները։ Փաստերի նման առատութեան պայմաններում չի կարելի ընդհանրութիւն շտեմել բոլոր օտարագիրների (բացառութեամբ վրացիներից ու քրդերից) կողմից Հայաստանում հիշուածների միջեւ։ Բացի այդ՝ միջագետքեան սկզբնաղբիւրներում Հայաստանը, սովորաբար, հանդէս է եկել մէկ հաւաքական անուամբ՝ Վերին երկիր, Նայիրի, Ուրարտու։ Հաշուի առնելով այդ հանգամանքը՝ կարելի է կարծել, որ լեռնաշխարհի հարաւ արեւելքում եւ հարաւ-արեւմուտքում վկայուած Արմանի անունը եւս տրուել է ողջ Հայկական Լեռնաշխարհին։ Աւելորդ չէ նշել նաեւ, որ ցայսօր սեմական արագացիների յետնորդները համարուող արարները հայերին կոչում են արմանի։

ԱՄՓՈՓՈՒՄ

Ի մի բերելով ողջ վերը ասուածը՝ կարելի է կատարել հետեւեալ եզրայանգումները․

ա. Միջագետքեան սկզբնաղբիւրների քննութիւնը թոյլ չի տալիս Արմանին տեղադրել Հիւսիսային Սիրիայում, իսկ էրլայական բնագրերում Հալէպի յիշատակումը Ha-la-bi ձեւով ի սպառ անհիմն է դարձնում Արմանի-Արմիի Հալէպի հետ նոյնացման փորձերը։

բ. Սարգոն Արագացու մասին պատմող նոր-ասուրական բնագրի Արմանին կարող է նոյնացուել Աղաղ-Ներարի Ա-ի յիշատակած

սահմանային (Աշուր-Բարեյոն) Արման-Ակարսալի տեղանուան հետ, (եթէ Սարգոնը Լուլուբից ուղիղ գծով է վերադարձել Աքադ), որը ուղղակի կապ չունի Հայկական Լեռնաշխարհի հետ կամ Սարգոն Աշուրացու յիշած Միմեսեան Արմանիի հետ (եթէ Սարգոն Աքադացին շարունակել է արշաւանքը Լուլուբից հիւսիս-արեւմուտք, ուր կարող էր մտնել Արմանի եւ յետոյ միայն վերադառնալ Աքադ), որը տեղադրոււմ է Վանայ եւ Ուրմիոյ լճերի միջեւ եւ դրանից հարաւ ընկած շրջանում:

գ. Նարամ-Սուէնի մասին պատմող Ուրի արձանագրութիւնները հնարաւորութիւն են տալիս Արմանին տեղադրելու Սուբարտուից (Հիւսիսային Միջագետք) հիւսիս գտնուող Բարձրաւանդակում՝ Հայկական Լեռնաշխարհի հարաւ-արեւմուտքում (չի բացառուում, որ «Բարձրաւանդակ» ընդհանրական անուամբ կոչուած լինէր ողջ Հայկական Լեռնաշխարհը):

դ. Նարամ-Սուէնի մասին պատմող խեթերէն «Նարամ-Սուէնն ու իր թշնամիները» կոչուող քնագրում յիշուող հիւսիսային երկրրների դաշնակցութեան ընդհանուր տարածքը ձգուել է Ուրմիա լճի աւազանից մինչեւ Ամանոս եւ Պաթթի, ուր եւ գտնուել է նոյն դաշնակցութեան անդամ Արմանին:

ե. Այն հանգամանքը, որ Նարամ-Սուէնը հիւսիսում եւ հիւսիս-արեւմուտքում իր դէմ ելած բազմաթիւ երկրների մէջ առանձնացնում է Արմանին եւ Էբլան, մտածել է տալիս, որ այս երկու երկրներն եղել են նշուած տարածքների գերտէրութիւնները:

զ. Արմիի մասին էբլայական քնագրերի հաղորդած տուեալների հիման վրայ այն տեղադրուում է Հայկական Լեռնաշխարհի հարաւ-արեւմուտքում, այսինքն՝ Լեռնաշխարհի էբլային ամենամօտ գտնուող շրջանում:

է. Ք.ա. 24-6-րդ դարերում Հայաստանի հարաւային եւ արեւմրտեան սահմանների լայնութեամբ յիշատակուում են, «ար/ւ/մ» հիմքով քսանից աւելի տեղանուն: Հաշուի առնելով այն հանգամանքը, որ միջագետքեան գրաւոր աւանդութեան մէջ, սովորաբար, Հայկական Լեռնաշխարհը հանդէս է գալիս մէկ հաւաքական անուամբ (Վերին երկիր, Նայիրի, Ուրարտու), իսկ Արմանին վկայուած է Լեռնաշխարհի երկու (հարաւ-արեւելեան եւ հարաւ-արեւմտեան) շրջաններում, կարելի է եզրակացնել, որ Արմանին եւս ողջ Լեռնաշխարհին տրուած անուանում է:

ԾԱՆՕԹԱԳՐՈՒԹԻՒՆՆԵՐ

1. «Շարունմէն» նշանակում է «չիրաւի նշմարիտ արեայ»: Այն, հաւանաբար, տիտղոս է, ստացում՝ գահ բարձրանալուց յետոյ: Ըստ աւանդութեան՝ նախեան գահ բարձրանալը նա Ե. յգեպան է եղել: Sbu' *Istoriya Drévnévé Vostoka*, T. I. *Mésopotamya*, Moskva, 1983, s. 234:
2. էրլան գտնում է Հիւսիսային Արրիայում, Հալէպից 75 կմ. հարաւ-արեւմուտ: 1974-1975 թթ. Իտալական հնագիտական արշաւախմբին յաջողուեց բացել էրլան (Թել-Մարտիխ հնավայր), որտեղից գտնուեց շուրջ 17 հազար բնագիր: Sbu' *Drévnnyaya Ebla*, Moskva, 1985, s. 318: Այսուհետեւ՝ DE.
3. Նարամ-Սուէնի ահադերէն արձանագրութիւններում երկիրը կոչւում է Արմանում, որի վերջին «ում»ը շումերա-աքադական մասնիկ է (հմմտ. Կուտիում, Ուրբիում, Լուլուրում եւայլն): Խեքերէն բնագիրը պահպանել է Արմանի ձեւը, որը եւ մենք կ'օգտագործենք այս յօդուածում:
4. Հ. Գ. Գարանֆիլեան, «Նարամ-Սին եւ իր բշնամիները ըստ հատեան բնագրի», *Հանդէս Ամսօրեայ*, Ե. տարի, Վիեննա, 1929, էջ 287-288:
5. A. Kifishin, «Géographichéskiy Vazzréniya Drévnikh Shumerov Pri Patési Goodéya (2162-2137 gg. Do N. E.)», *Paléstinskii Sbornik*, vip. 13, 1965, s. 64-65. Ե. Քասունի, *Նախահայկական Հայաստան*, Պէյրուք, 1950, էջ 28-20:
6. Ն. Ադոնց, *Հայաստանի Պատմութիւն*, Երեւան, 1972, էջ 26. Մ. Ա. Գալուսեան, *Արմէն եւ Հայ Անունների Մագումը եւ Ուրարտուն*, Պէյրուք, 1973, էջ 7-12: Այսուհետեւ՝ Գալուսեան, *Հայ եւ Արմէն*: Լ. Ա. Բարսեղեան, «Հնագոյն ցեղային միութիւնը Հայաստանում», *Տեղեկագիր Հասարակական Գիտութիւնների*, թիւ 1, Երեւան, 1962, էջ 88:
7. Քասունի, էջ 28. Գալուսեան, *Հայ եւ Արմէն*, էջ 16-17:
8. Viach. Vs. Ivanov, «Viédéliényé raznikh khronologuicheskikh sloyév v drévní armiyanskom i probléma pervonachalnoy structuri teksta guimna Va/kh/aknu», *Պատմաբանասիրական Հանդէս*, թիւ 4, Երեւան, 1983, էջ 30-33: Այսուհետեւ՝ ՊՐՀ:
9. Նշուած հեղինակների աշխատութիւնների ուստերէն բարգմանութիւնները ամփոփում են *Drévnnyaya Ebla* ժողովածուում:
10. Լ. Ա. Բարսեղեան, «Դիտողութիւններ ARMANI, ARME եւ URME երկրների մասին», *ՊՐՀ*, թիւ 2, Երեւան, 1964, էջ 324: Այսուհետեւ՝ Բարսեղեան, «Դիտողութիւններ»: Գարանֆիլեան, էջ 287-288. Գալուսեան, *Հայ եւ Արմէն*, էջ 13-14:
11. Գարանֆիլեան, էջ 287-288:
12. Բարսեղեան, «Դիտողութիւններ», էջ 324-325:
13. Ուսումնասիրութեան հեղինակն է վարդուհի Քալանթար Նալբանդեանը, որի աշխատութիւնը չունենալով ձեռքի տակ՝ հիմնում ենք Ալպոյանեանի հաղորդման վրայ: Sbu' Ա. Ալպոյանեան, *Պատմական Հայաստանի Սահմանները*, Գահիրէ, 1950, էջ 9:
14. Ադոնց, էջ 26-27:
15. Քասունի, էջ 28-29:
16. Sbu' Ալպոյանեան, էջ 9. նաեւ՝ ներդիր բարուէր:
17. Հ. Ժամկոչեան, *Հայաստանը Նախնադարեան Համայնական Հասարակութեան եւ Ստրկատիրութեան Շրջանում*, Երեւան, 1961, էջ 116-120:
18. Բարսեղեան, «Դիտողութիւններ», էջ 324-328:
19. Kifishin, s. 65.

20. V. Khatchatryan, *Vostochniyé Provintzi Khetzkoy Imperii*, Erevan, 1971, s. 106-107.
21. Գավուրեհան, էջ 7-32: Տես նաև Մ. Ս. Գավուրեհան, *Հայ ժողովրդի Մագուսը*, Մոսկովա, 1982, էջ 33-43:
22. Ռաֆայել Իշխանյանի ուսումնասիրությունների ամփոփումին համար տես նրա *Հայ ժողովրդի Մագուսն ու Հնագույն Պատմության Հարցեր*, Երևան, 1988, էջ 42-47: Տես նաև *Բնիկ Հայերեն Բառեր և Հնագույն Փոխառություններ*, Երևան, 1989, էջ 56-57: Այս բուարկուած աշխատությունները տուեալ հարցին նուիրուած ուսումնասիրությունների ողջ ցանկը չեն կազմում:
23. DE, s. 284-285 (Փ. Գարեիլի յօդուածը):
24. Գարանֆիլեան, էջ 287-288. Kifishin, s. 105:
25. Տես՝ նոյն, էջ 64-65, Ե. Քասունի, էջ 29:
26. Գավուրեհան, *Հայ և Արմէն*, էջ 32. Kifishin, s. 64:
27. Այս տեղանուան ենթադրեալ ընթերցումը վերցրել ենք Ադոնցից, որը վկայակոչում է: Յորերի, Բ. Հրոզնու և Ա. Սէյսի ուսումնասիրությունները: Տես՝ Ադոնց, էջ 26-27:
28. Khachatryan, s. 104-107.
29. I. M. Diyakonov, «Assyro-Vavilonskiyé Istochniki po istorii Urartu», *Vestnik Drevnei Istorii*, 1951, 2-4, p. 26, 42, 43, ախուհետի՝ AVIU.
30. G. A. Mélikishvili, *Urartskiyé Klinoobrazniyé Nadpisi*, Moskva, 1960, s. 150-151, 445.
31. Բարսեղեան, «Հնագույն», էջ 87-90:
32. Ըստ մեզ հասած աղբիւրների՝ Սարգոն Ա. Բաղացին արշաւելով հասել է Փոքր Ասիայի խորքում գտնուող այդ Բաղաքը: Տես՝ *Istoriya Drévnévo*, s. 238-239:
33. Գարանֆիլեան, էջ 285-286. Գավուրեհան, *Հայ և Արմէն*, էջ 15-16:
34. AVIU, p. 46 (178). Ս. Տ. Երեմեան, *Հայաստանը Ըստ «Աշխարհացոյց»ի*, Երևան, 1963, էջ 62. Թ. Ս. Յակոբեան. *Սա. Տ. Մելիք-Բախչեան, և Լ. Ս. Բարսեղեան. Հայաստանի և Յարակից Երջանների Տեղանունների Բառարան*, հտ. 1, Երևան, 1986, էջ 282:
35. Գարանֆիլեան, էջ 286-287:
36. *Istoriya Drévnévo*, c. 246.
37. AVIU, p. 28 (174), 35, 49(6), ծանօթ. 13: *Հայ ժողովրդի Պատմության Գրեատմատիա*, Երևան, 1981, էջ 26-27, 34, 43-44, 61, 68:
38. Այս տեղանունը յիշատակուած է Շամշի-Ադադ Ա-ի (Ք. ա. 1813-1781 թթ.), Համուրապիի (Ք. Ա. 1792-1750 թթ.) և Ադադ-Ներար Ա-ի (Ք. Ա. 1307-1275 թթ.) արձանագրություններում:
39. AVIU, p. 1. ծանօթ. 11:
40. Յակոբեան և այլք, հտ. 2, Երևան, 1988, էջ 499:
41. Գ. Բ. Զահուկեան, *Հայոց Լեզուի Պատմություն — Նախագրային Ժամանակաշրջան*, Երևան, 1987, էջ 335, 337:
42. Khachatryan, s. 105.
43. Գավուրեհան, *Հայ և Արմէն*, էջ 16-17. Քասունի, էջ 28:
44. Գավուրեհան, *Հայ և Արմէն*, էջ 18, 29-31:
45. DE, s. 320 (Դիակսնովի յօդուածը):
46. DE, s. 285 (Փ. Գարեիլի յօդուածը):
47. Ivanov, s. 32.
48. DE, s. 286 (Փ. Գարեիլի յօդուածը):
49. նոյն, էջ 286-287:

50. Նոյնացում է ժամանակակից Ուրֆայի հետ:
51. Մարիի քնագրերում՝ Ir-ri-id, խեթական աղբիւրներում՝ Ir-ri-ta/e, Ալալա-իի եւ միջինասորական քնագրերում՝ Ir-ri-di: Տեղադրում է Կարճեմիշի մօտ, Եփրատից արեւելք. տես՝ DE, s. 283:
52. Հիւսիսային Միջագետքի նշանաւոր քաղաքներից մէկն է:
53. DE, s. 286.
54. Ivanov, s. 31-32.
55. Khachatryan, s. 128-139.
56. Ivanov, s. 32-33.
57. Երեմեան, էջ 55.
58. Ivanov, s. 30-31.
59. Ադոնց, էջ 26.
60. Ադոնցը Լուրդին տեղադրում է յետագայ Արգանենի (Աղձնիք) տարածքում: Աւելի Հաւանական է թւում այդ տեղանունն նոյնացումը Ասորեստանի Հարաւային սահմանային նոյնանուն ամրոցի անունն Հեա, տես՝ AVIU, թ. 1, ծան. 7:
61. Միմեաի անունով կիրճ է յայտնի Սալմանասար Գ-ի եւ Երկիր՝ Աչուր-Նաճիրայալ Բ-ն Տես՝ Ադոնց, նոյն տեղում; AVIU, թ. 23 (1, 54):
62. Ադոնց, էջ 27:
63. Ք. ա. 3-րդ Հազարամեակում յայտնի են Հայկական լեռնաշխարհից կատարուած գաղթեր Հիւսիսային Կովկաս, Կիլիկիա, Սիրիա, Պաղեստին եւ այլուր Տես՝ Հայ ժողովրդի պատմութիւն, Երեւան, 1971, էջ 139-140.
64. Khachatryan, s. 90-91.
65. Նոյն, էջ 94-96.
66. Ժամկոչեան Հ., էջ 120-123.
67. AVIU, թ. 10 (2, 89), 11, 12, 13, 18; ՀժՊՔ (Քրեստոմատիա), էջ 21.
68. AVIU, թ. 18.
69. AVIU, թ. 10 (2, 63), 10 (3, 73).
70. AVIU, թ. 10 (4, 43).
71. AVIU, թ. 23 (2, 2).
72. AVIU, թ. 26 (ob., 36).
73. Արմէի մասին տես՝ N. V. Arutunian, *Toponomika Urartu*, Erevan, 1985, s. 39: Արմէի մասին տես՝ նոյն, էջ 210-211.
74. AVIU, թ. 27 (2, 54), 46 (116) ծան. 16, 49 (269) ծան. 64; Հմմտ. ՀժՊՔ (Քրեստոմատիա), էջ 31-32, 34 .
75. Arutunian, s. 35-36.
76. Khachaterian, s. 106.
77. Գ. Նալբանդեան, *Դարեւ. Վչատարի Բիսեթունեան Արձանագրու-թիւնը*, Երեւան, 1964, էջ 8 եւ 14-15.

Ա. Մ.

THE ARMANI-ARMI COUNTRY
ACCORDING TO THE ACCADIAN AND EBLAYAN SOURCES
(A geo-historical survey)

(SUMMARY)

ARTAK MOVSISIAN

Making an abundant use of the givens of both ancient and modern historiography, The Assyrian, Accadian, Hittite and other mesopotamian inscriptions, and the new findings from the Ebla excavations in Syria, the author tries to locate Armani/Armi one of the components of Ancient Armenia, prior to the creation of Urartu, the country of Ararat. At the end of his lengthy and meticulous study of the givens and new findings and an overwhelming analysis, Movsisian concludes that as Upper Country, Nayiri and Urartu were collective names given to the Armenian Tableland, so also Armani/Armi was for the south-eastern and south-western sections of the same geographical regions presented both the country Armenia, and its people, the Armenians.